

+



鄭少谷先生全集附錄

後學邵捷春彙輯

志傳類

明南京吏部驗封司郎中鄭少谷先生墓

碑

林 鈇

鄭子少谷繼之氏諱善夫世居南湖閩邑大鄉聚代多顯者皆其族產獨鄭子結菴就賢劬誦今學賢者殊振絕也嘗誦曰墜道非時也萎儒與世靡視古太峻脆志以降其趨吾固疾學之

不變果懇學十年反之古 孝廟乙丑歲年二十一第進士正德改元纂脩蘇松常鎮實錄成隨繼居內外艱積六年起銓戶部主事出理滸市關譏闡不敗名商人利之稱其能廢私也武皇初赫柄中官鄭子善卦時歎曰大丈夫當龍鳳於世退見無骭枉我志力告得請乃築少谷草堂於金鰲峰作遲清亭俟天下之清交與鮮絕巖居六載正德十三年有司勸駕起奪其疾改禮部祠祭清吏司主事十四年轉本司署

員外郎三載考績 推恩父母如其官居禮部握蘭建禮宗伯咸賢其文學能秩相也是年三月 武皇將南狩齋謀諸寮案曰駕未發諫之可絕否吾股肱何勸吏兵刑諸曹郎中黃鞏等若干人同伏跪于 闕門疏惻切指斥嬖臣江彬及中官輩濁亂天下也怒犯之 武皇杖之闕下死者貶者落籍于民者有差旣南狩鄭子切告未得明年鈇至京師之館焉談畫時事曰天子何可爲計哉古云曙戒勿怠後穉逢殃吾

胡可弗歸遂歸過浙山人孫一元太初死走道
塲山中哭之敦治喪事畢游越山水至逾八月
旋聞居湖上歲多病必滿時月間已必往佳山
水游或憫其羸告之癖曰吾少谷靜中不畱求
佳突吾思耳益誇嚴云江南北山水畢受吾杖
屨之嘉靖改元以都御史周季鳳御史汪珊薦
起爲南京刑部郎中尋轉吏部驗封司至建隄
眷武夷游值風雪膚理弗密以病病且依依不
休其游至弗支彊輿病歸歸二日不祿及歸已

彌留人意所豐藏鄭子云請諸君勞苦少休少
谷可以存神明晚與訣力手書授高澂傳汝舟
二子曰脩身俟死吾今更復奚憾詩文妻子付
託高傅二弟經理其寄延平遺書皆如云乃啓
手足以逝歲癸未臘晦前二日周身與棺澂與
汝舟治也後發笥皆窶窶鄉人始駭發鄭子之
貧士知賢鄭子能有道其官嗟夫財利者世不
學皆能旨嗜之俗殉痼厚儻然曰居官必多得
財故有道者雖親且戚况鄉人夫旃旃仁義何

以破愚利固善昏世禽鹿視肉如鄭子者能居道也夫觀鄭子婚嫁七弟妹賢業皆其推與儒者贍之田令以完娶節葬母屬二十二人其治身嚴厚冲澹高潔求象其道于家國誰昔日任重者身也途畏者口也致遠者道也邪行亡平體違言不存口道可要諸遠矣寡交多親忠信則交慶其言旨乎鄭子蹈言今微見之實完固以沛譽衆固稱少谷先生云訃傳至者咸哀涕蓋憫賢者弗長世沒時年三十九益可哀夫葬

事纖悉皆福州太守汪文盛少守陳鏞二先生功德也二先生鄭子至友孤鳴梧少保孤恤亡鄭子知德於幽冥創見友道叔世可興起矣墓在懷安西郊外梅亭山山旁諸達汪先生念口碑可世垂以章顯賢者云遷前室安人袁氏合隧遺言有二子求不累其托鄭子生成化乙巳歲十一月二十日也

論曰鄭子博學而能反之者也吾觀少谷子道論子通經世要談悠哉言乎大旨鬱然可觀其

概之正而已探其要本忠信成節則非繡言觀
交際編及余居京師與游者盡海內名士其志
念深常有以自下故皆以道相膠漆孔子云斯
焉取斯易曰同明相照同類相求雲從龍風從
虎信夫短長名位君子何可論之嘉靖三年甲
申十一月二十八日友人汪文盛陳鏞立石

少谷子傳

黃 綰

少谷子者閩人也姓鄭氏諱善夫字繼之少負
才名不遇師友學幾五變而始志于道就其所

履考之謂今之豪杰非耶蓋少谷初業舉子欲
從今世成功名乃自悱曰舉業足盡此生乎遂
刻意爲詩文將追先秦莊屈唐杜諸人之作研
求步驟既得之又自悱曰文詞足盡此生乎遂
慕東漢以來至于南宋高人逸士孤風遠韻之
可激者而追蹤之又自悱曰風節足盡此生乎
遂慕西漢以來至于盛宋將相名公鴻勛盛烈
之可垂休者而從事之又自悱曰功業足盡此
生平遂慕堯舜以來至于孔孟脩已經世之可

叅立者而尚友之曰道在是矣吾將沒身於是
乎昔歲壬申予官後軍知未足于道將隱故山
求其志少谷子爲戶部主事督稅吳江之澣墅
予過而遇之握手與予語竟日而別別猶眷戀
曰吾亦自此遯矣子不爲我棄其將訪予于天
台鴈蕩間乎予歸六載歲丁丑而少谷子果來
遂與坐凌峰步石梁倚天柱面龍湫倦則歸紫
霄臥予所居謂之石龍書院者時天晦大雪浹
旬不止人蹤盡滅予晝伐松枝夜燒楮軸與少

谷坐劇談堯舜以來所傳之道六經百家禮樂
刑政天文地理之源流及二氏之所同異極于
天地之間無一不究少谷子亦盡出其平日所
著述以質予又貽書其友孫太初高宗呂傳木
虛使之遜志而同歸故太初之逃老歸儒皆少
谷啓之也少谷子又自謂生平知己莫予若者
但恨相遇之晚遂忘形而不忍去予兄芝谷主
人因爲少谷子亭以居之南洲應子亦來會凡
數月而出至台城台守金陵顧公欲重勝會乃

作玉輝之堂以延之少谷以起疾將趨朝予乃
與南洲子送之渡錢塘而還少谷子又與予期
曰吾爲父母贈典未獲有此行行當不遠再訪
予于茲山以共老焉少谷入朝爲禮部主事陞
員外郎三載考績推封厥父母 武皇自稱威
武大將軍鎮國公欲幸泰山遂從南狩廷臣莫
敢議者少谷子特爲疏論其非禮竝指斥權奸
之所以逢迎及巡游意外之虞詞極剴切率羣
僚其上之 武皇怒杖之闕下或死或竄或削

籍爲民者而少谷子瀕于死者亦幾矣旣而告
歸果再來山中文同入鴈蕩登天台臥龍湫華
頂之間糧絕肴盡則掇山花乞僧糜以食各旬
月而去旣而 武皇晏駕今 上入繼大統予
與少谷子先後各被薦召少谷子又貽書于予
曰今 上冲年百無玩好一味恭默誠堯舜之
資也今所急者知學之臣以講明古帝王執中
之傳使聖德日新月盛然後可以責成唐虞之
治今日四方徵召多是林丘冲養君子今日所

關又非尋常百執事如先生者宜直處之以論
思之地勿泥常格更得一二元臣鼓動其間使
舉朝皆相信附使有道君子得行其志積之歲
年不患先王至治不見于今日也旣而聞朱御
史白浦之卒則爲詩哭之曰柱下朱郎成永別
江東黃尉竟何求黃尉指予也以白浦常薦予
故其卒而云云予出陞南京都察院分司携家
過越聞少谷子陞南京刑部郎中未幾改吏部
郎中有書期將至越訪陽明先生先生聞之喜
留予候之月餘不至而少谷子計至計者少谷
出經武夷陟絕巘闖陰洞不知其疲且襲寒醫
誤用藥遂病革速輿歸家至家二日而卒卒年
三十有九乃歲癸未臘月晦前三日也發其藏
蕭然無所有歛而葬之者皆福州守汪君文盛
爲之也少谷子器度溫厚而剛果超邁而淵密
清介不爲激抗負信不爲諒執皆天質之近道
也視其貌瀟灑清曠碧鬚蓮目若神仙中人至
其自勵實足茹粗糲耐煩勞馳風塵其取與可

以謝萬鍾而不顧揮千金而若芥其與人交小而語諾之間大而死生患難之際未嘗或爽又每有千里命駕而不失鷄黍約之風其處家第未七人少孤撫之成人而竭力爲之婚嫁又以其田贍族母及姊妹之孀居者又舉母黨之不能葬者二十二棺其居官許墅則寬商船之稅而不虧國賦治疆猾之罪以惠于良善禮部則每執典秩以贊于其長如論曆元歲差之未定日月薄蝕南北分秒之難齊皆鑿鑿有見足發古人之秘誠可謂超絕古往出夫風氣而不可以一世一方之士目之若夫天假以年充之學問於其中庸之繇禮樂之文進于聖門誠有可觀者矣惜其壽不永齡未見其止而止於斯已也所著詩文有少谷集者人以鄭詩鄭文稱之刻行于世又有子通論道經世要談者則錄而未行配袁氏子男一曰鳴梧女四長適陳次適進士林應亮次林出次庶出俱幼應亮以予與少谷子相知最深請爲傳乃述而論曰古之聖

賢所以濟非常之業立萬世之極者固其天資之絕人亦其有志而又有師友之成學問之功有以致之然則天資也立志也師友也學問也於人可缺一哉如馬遷賈誼陶潛杜甫李白韓愈柳宗元歐陽脩蘇軾皆天資絕人惜皆無志於道又皆不遇師友之真講明聖賢學問之功故其所成僅止于事功風節詞章而已又如慧可惠能馬道一呂巖張平叔白長庚亦皆天資絕人生不逢時厭世溷濁而逃于釋老他有心者又皆天資有所不及所以斯道之未大光至治之未大明也豈非世運氣數之使然乎今少谷子天資之美而又有其志蹉跎于世五變始有所聞而又遽止于斯其爲斯道斯世之慨之憾又何如也噫

鄭繼之先生傳

鄧原岳

明文章至弘治而一變於是作者百數十家而北地李夢陽信陽何景明吳徐禎卿及吾閩鄭善夫先生最著先生字繼之別號少谷山人而

自其初生太夫人夢日墮于懷吞之遂有身先生幼負竒質髻椎隸學官則已厭薄一切經生言學爲古文詞有聲矣二十舉于鄉明年爲弘治乙丑遂成進士而何景明寔直中書相得懽甚益切劘爲古文詞已亳州薛蕙黃州王廷陳吳郡顧璘三衢方豪東平殷雲霄皆一時知名士後先至咸折節而交先生文酒過從靡間也毅皇帝初先生猶在選人纂脩蘇松常鎮實錄成隨丁內艱積六年授戶部廣西司主事出

權濟墅關譏闕有法著爲潔令是時中貴人方用事亂朝政先生鬱鬱不自得竟移病滿三月上書請告歸歸則築少谷草堂於鰲峰顏其亭曰遲清以見志交與鮮絕守令干旋徃候顏色先生以一童子支剝啄終無所造請諸公愈益賢之正德十三年先生病良已起補禮部祠祭司主事守員外郎滿三載考贈父母如其官嘗奏改曆元事宜語甚核詳經濟錄中毅皇帝之末年儲位久虛逆藩素蓄異謀嬖人江彬及

諸中貴人相左右爲奸諸曹郎黃鞏等以諫止
南巡語侵彬彬大恨矯旨杖闕下有死者先
生不勝憤挾舒芬張衍慶復上疏切諫彬益怒
罰跪午門已杖三十幸不死當先生罰跪時猶
草疏數千言納懷中言所以不當出狀謂方豪
曰死則上之無何而駕發先生詫曰已矣無
所容吾言矣彼地下者其以余牖下非夫哉遂
再請告歸山人孫一元故與先生契分不薄先
生歸一元且死則間道之茗溪哭之爲經紀其

喪浙東饒佳山水洞天石室多仙靈壑宅如禹
穴天姥蘭亭鴈蕩之屬慮無不受杖屨者嘗雪
中遊天台褐衣筍輿吟趣甚適時顧璘方守天
台聞之曰此必吾繼之也亟使人邀之爲盤桓
竟月無何歸閩有終焉之志先生故居南湖去
郡城五十里而遙地稍勝先生與一二曹偶如
林鈇侍御傅汝舟高澂二山人日觴咏其中而
守君汪文盛者時時屏騶從從之先生爲具筭
噐食濁醪數斗佐以杞菊汪轟飲至醉也嘉靖

改元先生用薦起爲南京刑部郎中尋改吏部
行至建寧遊武夷山大風雪爲寒所中竟游歸
病遂徂抵家二日而殊年三十九耳病亟猶手
書鄭重以遺文託高傳二子而後瞑目死之日
紫氣勃勃不散蓋先生客天台嘗語華玉明年
海上紫氣東來是吾觀化至矣人以其語驗云
先生爲文章泚筆立成渾雄蒼老大抵出入諸
子而本之六經其詩以氣格爲主以悲壯爲宗
古詩樂府沿漢魏下及六朝歌行近體抵掌少
陵絕句翩翩有青蓮之致書法尤入神真行書
酌聖教狂草奔放縱橫爛熳顛素而下弗論也
間又創意點染花草叢篠恠石得象外趣然絕
不名其業以此人亦鮮知者嘗一晤王文成於
毘陵慨然有味乎性命之學則從湛氏得其緒
而力行之功取專詣非獨立門戶而已先生每
言經生局迹蟬緩其衣多文辭而鮮實効何益
於殿最乎居恒取國家掌故講其廢置所繇及
利害甚愜每郡邑有大政先生輒爲決策務中

機宜其所莊事者莆陽林俊司空林雅推轂之
謂有大臣之噐厄於年而不得售惜也林鈇又
言先生篤於內行婚嫁七弟妹羔鴈筐篚無不
自其手指出者塋毋屬二十餘喪皆假貸於子
錢家其厚如此汪守君旣塋先生於梅亭已編
定其詩文若干卷行于世而子通經世要談軼
不傳鄧原岳曰余小子與鄭先生不相及而於
先生外孫林學憲道茂許覩先生像髯而都若
神仙云其集今盛行世有知者或乃謂時非天
寶位靡拾遺以無疾呻吟爲先生病夫明正德
於唐天寶安取低昂哉而欲呻吟者之必賡歌
也惟王元美評其詩如黃河水凌得杜之骨庶
幾實錄云

福州府志文苑傳

林 爓

鄭善夫字繼之閩縣人弘治十八年進士善夫
弱冠登第與洛中何景明同年相切劘善屬文
尤長於詩七言近體興致清遠議者或謂得杜
之骨又謂正德間關中李夢陽摹擬少陵然猶

丐膏馥自出已意爲之至善夫并襲其意時非
天寶地靡拾遺殆無病呻吟云善夫官終南吏
部郎其同時有林鈇傳汝舟林鈇字克相傳汝
舟字木虛其詩大抵與善夫相類鈇不長於文
好用竒字令人不識爲工然鈇所用字非素習
也第臨文簡古詩得之日稍久或指以問鈇鈇
亦不識也鈇爲御史頗爲鄉論所訾汝舟晚好
神仙之說數出遊諸名山往往與海內名流接
汝舟性恬靜耻干求士大夫咸以爲塵表云鈇

舉進士官至御史謫州判罷歸汝舟終布衣

按何景明弘治十五年進士非善夫同年林
文恪誤矣

福州府志風槩傳 林 材

鄭善夫字繼之閩縣人弘治乙丑進士弱冠登
第授戶部主事時逆瑾亂朝政善夫以病告歸
居六年起補禮部 武宗末年嬖人江彬導
上南巡杖諫官黃鞏等下獄善夫上疏切諫
上怒罰跪午門五日杖三十幸不殆當善夫罰
跪時猶草疏匿懷中謂郎中方豪曰死則上之

無何 駕發善夫哭曰已矣無所容吾言矣隨
再請告歸遍遊名山築室南湖顏其堂遲清以
見志嘉靖改元用薦起南京吏部郎經武夷窮
歷諸峰爲寒所中抵家而卒年三十九善夫工
詩以氣格爲主憂憤時事往往發之篇章評者
以爲得杜之骨與李夢陽何景明相伯仲云善
夫死汪文盛方守閩爲營葬行其集于世

東越文苑傳

陳鳴鶴

鄭善夫字繼之閩縣人善夫髻權隸學官則已

厭薄經生言學爲古文辭有聲矣弱冠舉弘治
乙丑進士而信陽何景明時直中書得善夫甚
權益相切劘爲千秋業一時名士咸折節而交
善夫靡間也 毅皇帝末年諸曹郎黃鞏等以
諫止南巡語侵嬖人江彬彬大恨矯 旨杖闕
下有死者善夫乃率舒芬張衍慶復上疏切諫
彬彬愈益怒罰跪午門已杖三十幸不死善夫猶
草疏數千言納懷中謂三衢方豪曰死則上之
無何而 駕發善夫哭曰已矣無所容吾言矣

彼地下者以其余牖下非夫哉遂乞歸居郡之南湖嘉靖改元用薦起南京吏部郎行至建寧游於武夷爲寒所中抵家而卒年三十九卒之日紫氣勃勃不散先是善夫衣褐走雪中游天台人以其爲神仙天台守顧璘聞之曰此必吾繼之也就之良是善夫因謂璘曰明年海上紫雲東來是吾觀化至矣至是天台人以善夫果神仙不謬善夫爲文章渾雄蒼老而本之六經其詩以氣格爲主而多悲壯之聲國朝作者世蓋推徐何李鄭云善夫每言經生局迹蟬暖其衣多文辭而鮮實效何益於殿最故其居恒取國家掌故講其廢置所繇及利害甚哲又談性命之學而力行之所著鄭詩鄭文行于世而子通及經世要談軼不傳

按經世要談徐興公家藏有刊本俱謂軼不傳誤矣

國琛集

唐 樞

鄭善夫閩縣人性疎闊無留伏爲吏部郎曠志辭榮博學爲古文尤長於詩義不詭於風人浩

然仰頰縱游名山川其意嗷嗷如也正德末以
養病終其身

詞林人物考

王兆雲

鄭善夫字繼之福州人仕至南京驗封郎中氣
秀巖谷情發聲詩雖才韻弗克而古色精言高
映霞表飄飄然有逍遙遠舉之意好遊名山嘗
入武夷鴈蕩峻陟冥搜都忘內顧養病自遠逡
巡郎曹樂負高標殆輕人爵時與衢州方豪同
好意泊如矣嘗與友人期曰明年海上有紫氣
東來足吾觀化至矣赴官留省道中菴俎吁亦
恠也哉所著有鄭詩鄭文行于世雖卷帙無幾
人咸鳳毛麟角視之矣

藝苑卮言

王世貞

鄭繼之詩如冰陵石骨質勁不華又如天寶父
老談喪亂事皆實際時時感慨

昌穀之於詩也黃鵠之於鳥瓊瑤之於石松桂
之於木也高叔嗣空谷之幽蘭崇庭之彝鼎也
高季迪之流暢邊庭實之開麗鄭繼之之雄健

王子衡之宏大孫太初之奇拔顧華玉之和適
李賓之之通爽馬仲房之華整皆其次也 國
初習杜者凡數家華容孫宜得杜肉東郡謝榛
得杜魏華州王維楨得杜一支閩州鄭善夫得
杜骨然就其所得亦近似耳惟夢陽具體而微
鄭郎中善夫初不識王儀封廷相作漫興十首
中有云海內談詩王子衡春風坐遍魯諸生後
鄭卒王始知之爲位而哭走使千里致奠爲經
紀其喪仍刻其遺文人之愛名也如此

藝圃擷餘

王世懋

閩人家能佔俾而不甚工詩國初林鴻高廷禮
唐泰輩皆稱能詩號閩南十才子然出徐楊下
遠甚無論李迪其後氣骨稜稜差堪旗鼓中原
者僅一鄭善夫耳其詩雖多摹杜猶是邊徐薛
王之亞林尚書貞恒脩福志志善夫云時非天
寶位靡拾遺殆無病而呻吟云至以林鉞傳汝
舟相伯仲又云鉞與善夫頗爲鄉論所訾過矣
善夫詩卽瑕當爲掩善夫雖無奇節不至作文

人無行殆非實錄也友人陳玉叔謂數語却中善夫之病余謂以入詩品則爲雅譚入傳記則傷厚道玉叔大以爲然林公余早年知己獨此一段不敢傳會此非特爲善夫亦爲七閩人文吐氣也

按林文恪福州志云鉞爲御史頗爲鄉論所訾未嘗言及善夫也王敬美誤矣

詩藪

胡應麟

當弘正時李何王號海內三才外如崔仲鳧康德涵王子衡薛君采高子業邊廷實孫太初皆北人也南中惟昌穀繼之華玉升之士選輩不能三之一嘉隆則惟李于鱗謝茂秦張助甫北人而南自王汪外吳徐宗梁不下十數家亦再倍於北矣

余細閱當時諸家若仲鳧德涵敬夫子衡詩皆非長華玉繼之升之士選輩或調正格卑或格高調僻獨邊廷實視諸人差爲諧合

談藝集

張煒

弘正之間豪傑彙征百餘人焉其最著者李獻

吉何仲默鄭繼之徐昌穀輩獻吉雄豪壯麗如
長江巨浸滔滔千里雖有枯槎敗筏無妨飄蕩
又如龍翔虎變駭人耳目仲默雅麗新奇如洛
園一開姚魏掩映又如鳳儀韶闕麟出周郊誠
希世之瑞也繼之沈鬱之思慷慨之詞如蒼松
挺秀古梅含芬又如賈生之獻治安雖過於感
愴終不失爲識時務之俊傑焉徐昌穀淵致秀
語天然獨步又如唐玄宗霓裳羽衣於月下奏
爾仙樂此四子者撰述備矣

風雅叢談

王應山

鄭善夫字繼之閩縣人弘治初弱冠第進士海
內詞人相與頡頏仕爲戶部尚書郎屬請告家
居與郡人林鈺高澱傅汝舟鄭公寅施世亨李
銓李江先伯父戶部文晦先樵雲山人文旭倡
和追隨閩人復稱才子王世貞評鄭詩以爲得
杜之骨林宗伯爓撰郡志列文苑謂時非天寶
位匪拾遺殆無病而呻吟者大不然哉鄭文詩
各若干卷汪守文盛刻之郡齋邇鄧學憲原岳

重梓之爲叙論解嘲亦一快也鄭詩登泰山日
觀峰東嶽乾坤定黃河一縷分日排瀛海浪天
入薊門雲魯道傷吾志秦碑自夕曛未堪疏遠
目萬里正祲氛時事可知也嘉靖更化起南吏
部郎中道病卒年未四十汪守葬之梅亭山先
考偕諸彥過之詩云騎箕人已遠舊侶總堪悲
爲憶藏舟壑同扳掛劍枝草青侵曲徑苔綠上
穹碑日暮空山裏悽然共賦詩

少谷遺音卷跋

傅汝舟

曾記少谷作此卷謂高子吾字雖未通神已是
超凡入聖矣今觀信然其最後章缺人字高子
強余足之筆力相去甚遠於乎少谷死幾十年
矣余學不加進於一節之小尚不能及况敢望
其他耶撫卷愴然

又

張詩

張詩曰嗟嗟傷哉余安重視我少谷子之詩翰
乎少谷子爲人忠誠仁智俊極文辭交游徧海
內諸賢而比能於少谷子殊鮮然卒之年不及

四十者予嘗聞天壽仁人而天脆薄劣獨少谷子不壽何哉獨少谷子不壽何哉乃揮涕掩卷以歸高子

又

馬明衡

嗚呼此少谷絕筆也少谷臨沒之時書數紙付高子其末篇缺數字余諦觀之其神妙變化較之平時之作遠甚少谷亦甚自得也少谷負大才薄宦達而耽山林其靜中充養完粹故其晚年所進如此藏之者與觀之者毋徒以其藝之工而已也

小草齋詩話

謝肇淛

自北地信陽興而吾閩有鄭繼之應之盡洗鉛華力追大雅盛矣然搢擊百家獨宗少陵呻吟枯寂之語多而風人比興之誼絕譬之時無春而遽秋人未少而先老才情未肆骨格變衰樂事未陳聲淚俱下此在少陵爲之已非得意之筆而况效顰學步面目可憎者哉故人爲詩道中興於弘正吾獨以爲運之衰也此可爲識者

道也

刻少谷先生集序

丘齊雲

國朝弘正間北地李崆峒以古文詞倡海內而一時屬和如晉安鄭少谷者寔與伯仲故談藝之士褻然以二先生爲稱首云不佞生也晚未及其門逮官民部閱往牒乃知二公咸用是官起家也于是從署中築吾兼亭日取二公詩文讀之仍作一詩見意亡何聞而和之者數百篇不可知世有同聲哉去歲出守潮謁督學使者碧麓林先生于嶺南手授鄭先生詩文曰此編爾向所讀者盍梓以傳不佞喜甚歸付之梓人閱月畢工竊念之先生何如人哉振衣圖南溯遊溟北聲光燁燁流著海宇乃遭時不弔抗疏削迹中間顛沛流離日晏未炊然皆處之泰然不少見于顏色至于泉石之事君自以爲爲政若而人也豈直一鄉一世之士哉嗟夫以彼其才使之際清明悉洩所蘊藉未必不追蹤姚張以收黼黻之功乃齟齬郎署之間不得一日安

其位而行其志竟淪落以死也悲矣然亦以此故得肆力于詩文從今觀之渾平若璞澹平若太羹之味森平若發武庫而莫可窮狀也其詩或感激世變時遇幽憂一切規法少陵至晚年之作又能齊生死一常變彷彿于南華逍遙之風蓋浸浸乎澤于道德者矣此之謂業天壤俱敝也假令台鼎足重先生乎王元美曰繼之之雄健如黃河積冰寒色干仞又如石骨巉巖俯入幽澗知言哉今督學君于先生爲甥家學淵源愛而傳之宜也昔者王儀封初不識先生及卒之日千里遣使紀綱其喪事仍刻其遺文夫世之士有能使素所未識之士一旦身死之後而慕之若此者乎其非聲音笑貌之力也必矣則茲督學君之梓以傳尤非私于先生可知矣李集有全刻乃先生詩文舊無倫今彙而輯之得二十九卷復以先生墓碑與輓詩及諸公序文爲附錄一卷

題少谷文集

林俊

余亡慧執故滯真無足世道繫也居閒處獨謬
意作古文詞取六經傳記秦漢而上書謬讀之
亦謬効之竟無得其大都如航廣川茫然津涯
捕風影無所得鏤脂刻冰負成勞於工巧又如
宿留東萊凡骨未斲身固在此也今年年六十
六倦以老矣榕人鄭少谷繼之齒後余以倍悟
獨前庚申余過其諸祖藩叅建中少谷尚少語
余忘之矣嗣是少谷文日起伸縮兩儀顛倒萬
化輪古今而上下翫弄作者于掌股之間羣喧

就寂靈響効職源典墳宗風雅出入莊騷以直
附左氏超凡突詣易吾難如此也螭與鸞鳩决
起而飛槍榆枋鵬搏扶搖而上者九萬里凡馬
搃策不盡一舍一日千里國馬固能之物諸天
異也抑風之積不厚則其負大翼無力鵬獨運
乎哉馬食日盡粟一石則飽飽則力而材美外
見少谷將無是之遭歟善自愛哉少谷袖稿來
雲莊商略其臧否駁純以訂所學噫子實惠我
惡置我一喙哉無已則有告焉文寄道者也韓

子踔絕齋澄千狀萬態而卒澤於道德仁義炳如也少谷善自愛哉余將焚筆瘞硯以答子一篇遂強疾仄枕書爲別

題少谷文集後

林 鉞

鄭子坐余於少谷草堂與論今古之聖賢曠絕於世之傷岐德與文聖丘賢軻德文稱矣后軻之愈愈視軻則愈固弗若矣聖賢同不同如此其曠絕也已世之邀弊盡人以詞夫斧藻其詞德之藻矣詞藻寔僻蕩德藻寔飾華僻蕩飾華

時之然也奈之何其弗傷也故曰天下有道則行有枝葉天下無道則詞有枝葉夫行有枝葉者根本盛而條達也詞有枝葉者蕪詞曼說佻巧者之淺是故豪傑之興者世責之賴也鄭子其身之自根本而達未彊而負望於天下天下之知鄭子者唯曰其能通乎古之詞矣嗚呼鄭子無通於古之道歟古之道不爲利回不爲義疚守近如守官是故鄭子之成也於今之樊橋然而反之正以詞盡人不亦銳乎使未有樹是

市人舜裳兮決其否也信乎鄭子者於今誠曠
絕也况樹乎後者其又臚焉耶余從而卜之也
余奚張之哉

題少谷文集後

黃鞏

傳曰文以足言言以足志不言誰知其志余友
少谷久矣讀其近稿乃始得其才識之高意度
之廣更歷之久且熟也鄉之知吾少谷不猶淺
乎繇是觀之世之人欲以片言而決底裏一傾
蓋而盡得其平生者皆非也雖然少谷之所以
自見於世者殆不止此余也又奚足以知之

題少谷文集後

殷雲霄

六經之文天也諸子山川草木也鉅纖醜正不
倫亦各有生意矣下此直繪畫耳繼之知文者
因以問之

題少谷文集後

王鳳靈

文道之榦也本之則夷而榦是用崇其不可崇
朝植也賊夫道而澤夫文可乎壞殖削榮厚庇
之以上以反求其本或有能生者矣昌黎子似

之吾用是觀少谷焉漫言乎漫言乎

刻少谷文集序

周廷用

少谷子鄭繼之弱冠穎異善屬文既長登第汎
交海內名流濩落無所容遂託疾遠遊慕鄒魯
之風遵海岱凌日觀旣乃浮淮達泗適吳徂越
探禹穴躡鴈宕振衣風塵之表其意嗟嗟如也
已而結屋少谷之山潛心大道攬觀萬物之終
始譬猶鸞鳳乘風九閼之上飄颻游豫而時人
莫測也夫辭榮耽寂者其志曠窮幽邈遠者其
思竒故其放而爲詩也龍翔虎變波湧雲蒸備
極情態命世之詞也詳其所至正足以翼三百
篇之經變可以摹於騷漢法以準其體魏辭以
則其要晉選以暢其氣唐音以澤其和盡性情
物理之懿義不詭於風人或曰少谷詩人爾余
觀少谷遺周方伯衡山高云周夫子崇高遍博
要如此平生意氣吾與爾使天假以年則事業
余莫之究竟矣少谷已沒其言立於後世死而
不朽其以是夫

書少谷詩後

林民止

海內談詩無慮千家其高者乃稍取裁漢魏至叩其音節猶在臆中人謂繼之詩擬杜甫卽杜甫何擬杜甫詩於古時或出入近體則齊梁之變者也夫自三百篇之不得不爲漢魏漢魏之不得不爲齊宋王岑盧駱者時使之也而能令曹絳談伊周之事不然矣繼之詩人以杜甫七言變體所謂抵掌叔敖古詩綽有蘇李風致至其恬澹冲雅亦或離而去之夫詩心言燕齊梁魏無方言他或以方江南之橘江北爲枳地土有然吾以爲詞致可學風骨不可學此詩所以有列國之風也家大人舉僕於燕十歲過洞庭浮沅湘登祝融之峰飄飄乎憑虛馭風二十而對公車入邯鄲以爲故土間從燕齊人語則或以爲莊嶽之間者顧恨不得繼之同時於以言風爲之太息

少谷詩序

謝肇淛

自三百篇之降也浸淫至於勝國蓋正始無遺

音云 國初作者尚沿餘習至弘正之際然後
琢雕破觚力返茅靡時則二三君子之功爲多
而吾郡鄭繼之先生其一也先生曠世軼才其
於詩有所獨詣命義勅詞蒼然古色高足頡頏
兩京下不失凌鮑謝朱絃希音型美寡和一切
人間藻繪可憐之曲不啻沈之濮水當時與北
地金昌諸君子執鞭弭周旋海內翕然向風要
其終身所至於少陵氏可謂具體而微矣先生
家食以孝友式里閭立朝抗疏濱九死而不回
死之日家徒四壁子孫至不能獨存蓋其生平
志行有足配千古者昔人所稱三立先生兼有
之非徒厪以詩不朽已也天旣奪先生之年而
復辱先生之後遂令其遺言幾至漫滅余小子
不勝懼焉曩歲議與諸同志一新之而弗果後
余李吳興而鄧女高計部以搜粟來會其志適
與余合遂稍爲較定而授之梓嗟乎自繪事勝
而情性遠七子興而大雅衰里中耳食之輩徃
徃喜遠交而近攻蓋先生沒且百年而論今日

始定悠悠黃河寧復可清而况夫其以下駟走者也掩卷卒業但有三歎

祭鄭繼之文

方 豪

維嘉靖三年太歲甲申十月壬辰朔越二十日辛亥友生開化方豪以炙鷄絮酒託友人汪福州希周哭奠于亡友南京吏部郎中少谷鄭先生之靈曰嗚呼少谷有古人之心而無今人之能有古人之才而無今人之用有古人之德而無今人之壽有古人之交情而無今人之報如豪者亦其一也豪之辱愛於少谷者何可言述而今繫于老父阻于瘡鬼竟不能克執紼之役雖束芻亦稽于致所以報少谷者安在哉然亦有說焉初遇王子陽於餘干聞少谷之計子陽尋復自疑而豪左疑也既會張信州景周乃知其讒且云少谷赴召及崇安而返矣方託汪福州致意然而人言紛紛不能無疑比歸棠陵復致書令弟問安否蓋愛之欲其生固人之情而仁者必有壽又天之道也詎意真有是哉嗚呼

此哀何能已乎直待隨我少谷于地下而後已
耳今因黃尉還莆之便姑先致此瘡又痛深言
失倫次尚當請命老親親拜墓下問孤慰嫠拾
遺稿紀遺行少圖報于萬一云至若豪之棄官
歸養蓋濡少谷之澤者亦少谷所樂聞不敢不
告嗚呼哀哉尚饗

鄭少谷先生全集附錄

後學邵捷春彙輯

贈答詩

少谷子行

何景明

少谷子在武夷之山二十抱策叩燕關朝排閭
闔暮湖海九霄萬里身巖攀豈徒聲名冠 帝
里要使蹤跡窮人寰竭來京華始一識意氣形
神兩相得肺腑真成水石痼詞章亦帶煙霞色
龍姿鶴性不易馴海思江情浩無極頃將東遊

觀岱宗便欲下泛滄溟中鼉風奔浪巖洞黑鼇
日壓山樓觀紅南浮江淮覽吳越復上會稽探
禹穴去鳥情生鴈蕩雲飛虹夜躡天台雪波濤
窈渺岑嶠移遍訪名山入武夷伏劒不憂百恠
出采芝或得羣仙隨只今妙年始三十辭官讀
書志何逸九曲煙花對草堂三山蘿月開芸室
已看鳳凰在千仞回首驂騑空萬匹八月高城
氣稍勁流鶯木葉交相映燕山遊子落日吟海
邊歸客秋風興他日遙尋少谷峰武夷莫作終

南徑

得鄭繼之書

鄭生湖海去高興渺難降累月音書數清秋涕
淚雙天邊登月嶠雪裏渡吳江萬水千山暮何
時到爾邦

寄少谷山人二首

武夷九曲上仙庭錦壘青天萬仞屏下望神人
鈎鰲石北風吹霧海冥冥

台嶽中峰綵霧生石梁遙掛赤霞城仙潭尺素

傳雲鯉報爾今尋華頂行

寄題鄭少谷園

三山今有鄭公園避俗從來亦避喧
蘿竹青青垂谷口花林靄靄覆桃源
天邊鴻鴈春寥廓海畔蛟龍晝曲蟠
南斗尺書招隱意白雲叢桂幾攀攏

贈鄭繼之

薛蕙

長安城中不可留風塵日日使人愁
上書解印我將去拔劍出門君且休
五岳登臨幾兩屐三江來往一扁舟
東西南北好行樂與爾相隨萬里遊

遠遊曲十首贈鄭繼之

并序

祠部鄭少谷以病謝歸烏石山中先將
抵杭越訪天台四明諸山南循浙江望
閩海而返余壯其行因賦贈之

烏石山中相紫芝少谷先生歸去時贈君試作
遠遊曲較似仙人碧落辭

闕下屢移稱病書知爾不復少躊躇海上但留

雙玉舄山中誰見五雲車

五岳之山君遍過名山不比浙江多赤城直上
仙人闕天姥斜連織女河

赤城宛轉石爲梁雲裏振衣千仞岡聞道台州
老太守爲君先已築舟房

太白山人高士流十年不出臥滄洲爾去相逢
託相訊南來僮許共扁舟

越中會稽天下無金城王室是仙都卽向山陰
覓芝草還從禹穴探靈符

丹山赤水足葦滋鴈蕩龍湫更自奇招隱頗憐
君去蚤移文應笑我來遲

鏡湖綠水畫難成五月南風菑菑生越女舟中
歌白紵道人醉臥酒船行

海門東去片帆歸却傍三山開釣磯人間物色
邴能見空向青天望少微

天地今經幾劫灰區區人世只堪哀莫漫著書
拋歲月徑須餐玉訪蓬萊

鄭繼之館內積雪爲小山戲作長句

君不見少谷子飢寒臥病長安裏長安臘月雪
一丈恠爾朝來何枝癢凌晨掃雪爲小山數峰
突出窻戶間我時過門訪子入子也階前荷鋤
立亂垂散髮雜塵垢斜挽短衣半沾濕憶子前
年覽吳越東游四明尋禹穴慣矜赤腳踏層冰
苦覓黃精劖山雪平生好奇心未已今朝戲作
聊復爾斲冰積雪止俄頃走海驅山宛相似仄
崕崩壁色悽愴玉膏乳竇陰森爽磊砢初驚大
禹鑿戍削飜疑巨靈掌君不見五侯甲第當此
時紅羅斗帳流蘇垂銅盤燒蠟綵雪散玉袖拂
面香風吹吁嗟如子何爲爾低眉蹙額凍欲死

酒酣歌贈鄭繼之地官

孫一元

司徒之官不可求蚤年通籍金閨遊青袍只今
厭奔走兒女衣食泣道周屢見文章出翠釜未
聞廊廟登天球鄉關萬里望不及風吹離思江
花愁野人勸汝蚤歸去塵埃骯髒難爲儔

朝廷嬖孽未除盡蚤晚尚有巴蜀憂冰雪照埜
驚歲暮行人烽火多阻脩天狼出明東海岍哀

凰獨叫西康州酒酣對汝不料事爲此長歌歌
未休

鄭繼之地官久不過湖上奉簡

惟爾狂吟客不過湖水濱寧遭官長罵莫得野
人嗔雲外烏藤杖花邊白鷺巾相看只自好空
送月華新

寄鄭繼之

少谷平生友青雲半載離豈忘吳地客不寄鴈
門詩嘯傲定何日經綸須此時後期解朱紱同
飽九莖芝

夢鄭繼之

不見平生鄭廣文風塵側望隔青雲殊方物色
偏憐客雨夜燈花頻夢君隔葉山鳩高自語避
人江鶴獨爲羣眼中此日堪惆悵塞北音書久
未聞

送少谷子繼之

少谷山人去不返洪河素舸坐長空一官臥病
菰蒲裏萬里看山煙霧中海內談詩名已動夜

深說劔氣還雄關西野客應憐汝君有當年季子風

鄭繼之新着小烏巾見訪作此戲贈

道人相見一笑同烏巾自製誇新工禮數懶慢
政着我山林風流今愛公眼前物議一時事溪
邊自照雙鬢蓬接羅倒載間紅羽何當江上尋
漁翁

憶鄭繼之

年來苦憶鄭夫子獨坐幽林興轉孤晶晶鷗羣
迴晚日青青菱葉散春湖何時共採金鵝菜此
日君猶銀兔符一笑滄洲終自去那堪風物眼
中殊

會江與繼之聯句

張天顯

海門潮入風初勁山脚雨來雲更多

巽所

龍起

煙江船背濕泥封石竹麝香過

繼之

旋懷落落

銜杯酒野景蕭蕭一浩歌

巽所

倚櫂殷勤問漁

父東南消息近如何

繼之

山行與繼之聯句三首

籃輿還還作山行野鳥林花不識名異所出洞

煙嵐遮嶺路愁人雲樹足江城繼之錦囊不盡

攜雲思綵筆常含題柱情異所醫國有魂招未

得終軍何計請長纓繼之

東郭西郊耨草天江南行客飽雲煙農家三兩

不成井繼之樵擔往來自作聯泉落竹根寒漱

玉異所苔生谿徑綠鋪錢翻憐病骨禁愁陣一

嘯松風過大川繼之

富陽江上水衝潮兩耳漁歌送寂寥繼之鳴革

當年歸海上羊裘千古在山椒異所沙頭蘋菜

還堪薦水國忠魂不可招繼之長嘅扣舷和逸

調乾坤空濶鬢蕭蕭異所

鳳山與繼之聯句

偶上林臯覽物華東南形勝此為嘉千山北走

三吳盡異所一水東歸百粵賒芳草郊原新第

宅繼之夕陽城市舊桑麻傷情莫說宋家事異

所猶有臨春剪綵花繼之

出杭立秋次日與繼之聯句

水國金風釀蚤秋繼之碧梧辭葉下滄洲波光

雜雨入書舫異所雲竇滿空妨旅眸蠶繭已成

桑柘老繼之柞燠初發稻梁收橫江忽聽一聲

鴈異所帶得關西消息不繼之

送鄭繼之歸閩余門人也

傷心嗟莫說南樓離思匆匆又薊州鷗鷺蘆花

成午夢雲山江月伴新愁太玄語塞侯芭壯編

帶情輕季子酬霜葉西風來日路獨憐任昉賦

交游南樓舊讀書處

菖蒲水冷菊花黃握手其如別思長敢謂傳經

擬公穀應憐作賦似盧王鵲巢未就風偏勁狼

鬣頻張月自涼君向南行吾在北高山流水求

相望

少谷子歌有引王廷相

閩士鄭繼之詞人之豪余聞之未覩也

偶覽其遺集有及余一詩云海內談詩

王子衡春風坐遍魯諸生我昔傳聞薛

吏部為君遙式洛陽城嗟乎繼之念我

深矣生也吾不及其會沒而見其文已
恨失繼之况平生有詩念余恨當何如
耶乃作少谷子歌酬之焚其稿于燕之
郊望閩海而再拜少谷有靈應鑒吾意
藉此神交慰我良友

君不見斯文天挺鄭少谷詞林閣筆推長雄六
鼇之力戴九土昆崙拄天高穹窿左日右月抱
兩丸象緯炯炯羅心胸文成直與元氣會思渴
一吸滄溟空青蓮豪逸建安骨力挽古格追鴻

濛少谷子紫薇宮闕遊不盡却下勾陳徧南北
日觀振衣盼東海鴈蕩天台幾眠食太白山人
許相交時人碌碌安能識少谷子汝初抱策升
明堂余已跼蹐流海荒南天北極渺雲霧紫宸
黃閣空相望彼時才傑遊帝傍信陽之何棠陵
方大梁翩翩李川甫吏部薛生尤擅場我也豈
堪天下士君胡念之垂篇章少谷子古來神交
隔山海安俟目擊道乃在覽吾詞翰魂夢飛萬
丈紅霞散天綵少谷子人生電掣須臾爾惟有

文章流萬禩眼前得失浪悲愁富貴勲華盡泥
滓少谷子人言海上多神仙羽人不死常朱顏
誰其獲者王子喬七月七日來人間君曾學道
叩玄牝吹笙驂鸞應未還爲君一戴雲華冠再
拜贈君雙玉環

贈少谷子別四首

傅汝舟

首夏氣恢台草木紛苞長芳蘭被洲渚嘉植翳
蔭爽逝節悲已淫邦媛浩遐想悠悠京華道泛
泛高水漿

岳水吹景風輕槩去若失朝發芋原江夕宿水
口驛濶遵泝劍津湍石衆溘崛雖匪蛟龍驚情
用或怵惕

怵惕情自怡人心重嶮巖嶮巖不可近傾仄孰
爲支豺虎委牀帳父母宿瘡痍行矣茂道力擗
哉壯士悲

壯士無還顧離析歡絕端狂瀾殺隄障歡端何
繇敦脩門切重入衰房隱層巒煌煌三靈芝遲
爾同加餐

喜少谷歸

一笑春初散南歸意已勞
王風時不競人事日相高
雨濕菰蒲氣風生鸛鶴毛
柴門近湖水知上釣魚舸

冬夜接少谷子京使有懷

一室風顏遠冲霄月色殘
近前問來使別去作何官
獻納朝還隱水霜國正寒
焚香先帝日莫掛武門冠

元夕同少谷登鰲頂爲余作攄石圖

下界燃燈夕高峰接手行
始知人代裏不及化王城
夜色虛明滅禪心澹送迎
異時對圖畫片石最含情

白龍洞少谷子題名處

城西小洞伏屋側苔深車馬塵
尚拋清泉何心亦避客
白龍與世本絕交林樞妬菊倩斜日
溪霧逐雨爭低坳遲迴忍讀鄭虔字
歲暮旅倦飢熊咆

送少谷上南都

岳立嵩衡竝身纓烏紱踈乞歸三疏日多病一
官初載出心應苦中興道不虛黃金縣駿骨知
上玉階除

鄭少谷吏部

詩傳鄭吏部清廟歎朱絃流作南閩派光爭北
斗前山中官自達海內友多賢伯氏忌交久憐
余喜執鞭

暮泛白馬湖懷鄭繼之

林春澤

返照明春湖片帆輕燼裏長空絕鳥飛汀洲見

芳菲美人望不來春暮吳江水

西湖次鄭繼之韻

湖上尋春事天涯泛梗同角巾山寺晚白馬柳
堤風澤國吏情遠 帝闈愁緒中未能從逋老
莫擬哭途窮

憶鄭繼之

少谷吾憐汝形骸亦已忘飄揚四海志嬾漫十
年郎玩世惟青眼歸山有草堂且從金馬隱與
爾共徜徉

次韻答方思道見寄兼懷鄭繼之張道宗
遲日思君子招携汗漫遊客疎嫌地僻官冷喜
春幽青草風煙暝空庭燕雀留何時拉張鄭披
豁話林丘

病中懷鄭繼之二首

抱病秋光老懷人不可攀何時同避地羨汝蚤
歸山興遠江湖外名高天地間芳隣吾已卜爲
掃白雲關

衛川分手去濟上寄書來白鴈秋天沒黃花遠
地開山翁迎舊侶朝士惜高才安石終當起蒼
生重可哀

答鄭繼之聞薦

聞道采薇去山中避薦書弋人何慕鴈漁父竟
登車驄馬開賢路客星明太虛長安雪霰霽遲
爾到天衢

大悲寺次鄭繼之韻

古人萬里去倦客亦思休悵望滄洲遠遲迴野
寺遊閒雲依淨土爽氣似清秋霄漢慚孤鳥人

天意白牛哀詞長激烈歲月祗淹留擬約鴟夷
權滄波天際流

雨中憶鄭繼之草堂

獨上孤亭憶草堂野雲度峽望微茫鷓鴣啼歇
山橫雨白鷺飛來水滿塘病起尚緣詩思瘦秋
高偏爲客懷忙翠旗峰下吾廬舊何日林陰掃
石牀

喜鄭繼之青野堂成

芟湖青野草堂新萬里雙魚慰我真錄事無此
堪寄遠裴公未老便投身紅塵走馬慚羈旅滄
海冥鴻笑弋人天上春風正遲汝白雲他日結
芳隣

夢中懷鄭繼之得江上漁舟忘歲月雪中

鶴筆似神仙之句覺而足成

塞雲飛鴈下遙天旅夜懷人入夢邊江上漁舟
忘歲月雪中鶴筆似神仙南宮文物思前輩北
塞風塵異昔年木柝淒淒霜月裏故山何處意
蕭然

次鄭繼之南湖舊居 鄭鵬

使君湖上宅，面面俯淪漪。魚鳥酬相狎，煙雲靜與期。畚人供谷，竦漁父課鷓鴣。一被塵纓縛，悠然繫夢思。

送鄭少谷之留都 林庭枝

湖上逃名獨養高，彈冠此日聖明遭。宦情已似錢郎薄，詩興猶如杜老豪。雨後菊花含別思，風前木葉點征袍。仙舟無那飄飄去，愁對江湖首重搔。

答鄭禮部繼之 顧璘

寥落混風塵，憐君意獨親。同吟山郡雪，稍醉帝城春。海月通幽思，宮鶯啞遠臣。期尋石梁去，還待謫仙人。

雪中鄭少谷黃石龍過郡

大雪滿山城，驚聞屐齒聲。本非安道室，真接剡溪情。小閣梅花笑，寒燈秫酒清。相看興難盡，樓鼓下三更。

送鄭繼之歸鰲峰

四月燕山雨雪寒省郎多病復辭官路經海上
三神島興在人間九轉丹玉洞桃花留笑靨滄
江秋水濕漁竿爾家谷口空長往安石東山望
未闌

夜坐鄭子宅彈琴

王廷陳

言訪少谷子呼童携素琴爲發絲桐趣俱諧出
水心徑轉松篁密堂虛風月侵再彈吾不惜此
地有知音

贈鄭少谷

汝昔辭郎日堂齋谷口尋經年種松菊携客遠
登臨澤傍蛟龍窟巖穿虎豹林朝朝泛煙艇夜
夜宿雲岑竟彼蒼生起俄驚白髮侵屢遊天姥
夢時動越鄉吟障魏東南美琴留山水音乾坤
倦鳥翰歲月狎鷗心骭髀遠朱綬疎慵本素襟
異時筋力在去矣極高深

懷鄭子

鄭子客遊淹吾廬詩詞間作真起予意當出門
與結束欲別上馬仍躊躇計月能迴楚水櫂經

年竟斷燕關書人生岐路恨南北塵暗望眼何
繇舒

贈鄭少谷

陸深

少谷吾年長凌雲爾不如庭中積秋雪爨下泣
枯魚舊隱青山宅初寮畫省居揚雄其寂寞白
首太玄書

哀輓詩

讀少谷遺稿

曹嘉

少谷詩三百流傳與細吟朱絃在清廟三嘆有

遺音歷代空多選諸唐抵似今明珠吾已得竊
照草堂深

又

顧可久

海內詞華士風流未似君遊情到滄海飄思入
青雲備見前賢體高垂一代文秋齋夜深誦白
露散清芬

又

周廷用

平生不識鄭台州海上相尋竟未投豈爲文章
傳麗藻却因儒雅擅風流十年夢想南州竝此

日儀形北海留更抱麟傷千古意不勝清淚灑
丹丘

望少谷墓二首

不見高人揚子雲山川到處動遺文眼前金匱
誰能識獨有侯芭爲起墳

玄塚纍纍荆棘荒夜臺何事葬文章長松老檜
叅天起喬木千年表鄭鄉

過經院讀少谷詩

汪文盛

瘴雨炎蒸午未深斜穿幽徑過禪林靈山日傍

孤城轉閩海雲生廢殿陰苦憶舊遊誰在眼讀
殘新刻倍沾襟抱琴那有鍾期意掛劍徒懸季
札心

讀少谷詩集四首

鄭慶雲

晉陵松檜風雲合吏部文章日月明讀盡遺編
人不見晚風疎雨暗長檠

憶昔長安結騎時青雲回首我來遲孤燈對坐
澄心處畢竟元無一字詩

少谷經綸竟若何眼前花鳥自酣歌時人莫作

詩人看杜甫憂時涕淚多

閩嶺音書隔歲年心期相失秣陵前爲懷國士
雙沱淚直與東流到海邊

聞鄭少谷訃音

祝鑾

少谷知心友祠曹舊日遊才名聞海內氣槩邁
儒流每抱長卿病猶多杜老愁可憐今已矣詩
草爲君投

夏日讀少谷詩

葉鈇

日永官閒午夢深暗香風細度晴林壓簾遙送
南山影隔座斜連北閣陰詩到讀殘知客調意
當戡破識胸襟一時同異人如玉空谷音長驗
此心

宿歸雲庵和少谷韻 林鈇

翠屏金界夜光飛星宿低搖白石扉高木嘯風
吹月小蒼林滋雨抱花稀巖前丹室悲空劫海
外閒雲去共依細拂霞文青壁滿短晨長涕鶴
雙歸

讀少谷集兼悼白浦后峰二首

別汝芋江去翻悲絕命時英雄偏短世
奚爲靈氣山川颯文章天地私欺危見妻子揮
淚益淋漓

竝哭朱黃死今歸哭女堂頻年淪益友一代慟
人亡鰲泣金峰暮星沉紫斗昏巖廊丘壑已名
世恨琳琅

哭鄭少谷先生四首 陳鑑

少谷今淪沒乾坤有幾人文章餘正氣河嶽失
精神出入居三省歸來臥四春空悲吳越暮涕

淚隔風塵

文星殞南紀東觀借豪雄言足裨綸綍詩堪繼
國風高情遺札在幽憤白雲空想見柴門色蕭
條青桂叢

二十登黃甲三朝侍紫宸才高何命薄官久只
家貧管輅聰明天虞翻骨相屯汗如來白馬執
紼越江濱

勝友今難得平生鄭與孫能文俱喪逝灑淚一
乾坤白日青天暮有懷無處言春花幾萬樹落

盡不開門

又

釋明秀

病裏驚聞盡一哭十年交誼竟何哉江關兩地
空遺恨猿鶴三山亦慟哀谷口柴門長落日平
生知己獨憐才臨風欲擬招魂賦猶憶西湖舊
日來

少谷高人無日起百年清淚幾時收嗚呼滄海
談詩夜翻作延陵掛劍秋詞賦永留山水興謀
謨空切廟堂憂交期猶想錢塘別心折風帆送

客舟

又

釋戒言

鄭公已長逝物議更無誰一病辭
明主三秋
淹桂枝經時風獨振憂國鬢將衰紫闕期班鵠
蒼雲忽駕螭些辭哀有托宣室召無時天喪斯
文戾才難志士悲高人多泪没大雅日陵遲一
識平生願終身是我師心傷春寂寂悵望淚垂
垂絮酒徒興念滄溟隔武夷

和勾谷哭少谷先生 方 豪

憶自胥門外風前見玉人清操能信僕妙思直
通神舟楫三江月衣冠滿座春回頭吟嘯地萬
事總成塵

憶自分吳越君才十倍雄還朝了公事秉筆振
文風憂世經旬病鮑山萬事空遲清亭上月猶
照菊花叢

憶自風沙起重逢覲 玉宸軒楹同擇里衣食
互資貧被杖矜身壯操著知命屯公嘗操著知
三十九歲必
死故决飄然復歸去終老白湖濱策歸去

憶自中峰寺詩僧狎祖孫雪江為祖
戒言為孫掀髯弄江
海拍掌笑乾坤行色竟難挽離愁何可言誰知
松樹底已作死生門

和雪江

少谷先生天上迴人間安得久留哉先生自有
神仙樂人世空為兒女哀似此英雄還短命不
如造化莫生才棠陵舊約應牽掛白日乘雲望
汝來

清世鳳麟隨地有 皇家疏網未全收可憐薦

稿施行日卻在病身狼狽秋養就英賢嗟莫用
事關邦國轉多憂誰知瀕死猶趨 命力疾支
吾建水舟

和戒言

爾去嗟何早吾歸更與誰坐驚梁月色淚灑野
花枝海內人才少天南文運衰朝陽思鳳鳥夜
雨泣蛟螭宗祀方髻鬣閨門總盛時交深宜我
託道遠付空悲膝下斑衣獨墳頭白馬遲荒山
其寡陋舊業失資師遺德千人仰雄文萬世垂
景公多駟者不及一齊夷

清明登少谷墓

海國清明祭掃紛誰人獨拜鄭公墳迴峰仄徑
迷青草短碣孤臺覆白雲濺淚山花空自媚
愁野鳥不堪聞莫言身後俱寥落天地長流少
谷文

寄輓鄭少谷先生

詹璞

真宰茫茫失主張英雄如子可淪亡生依丹闕
心應赤死人黃泉骨尚香李杜詩名堪伯仲班

楊文思孰低昂生芻萬里無繇致未賦招魂已
斷腸

玉樓促記卽登仙猶憶新詩祝壽年賈誼已無
宣室召相如空有茂陵阡吾思君谷情何極君
志吾厓句尚傳先生嘗爲余題吾厓卷千古知心惟鮑照
東風凝佇淚潸然

哭少谷詩五首

林春澤

艤櫂春湖上蕭蕭青野堂桑田忽以變松菊亦
無光末世風騷遠斯文骨肉傷平生知己淚哭

汝白雲長

執紼向何處青山白雨邊名高天亦忌道重世
爭傳江漢先歸日英雄不盡年梅亭有豐碣終
古麗雲煙

少小暮儔侶論交爾獨深百年兒女眷四海弟
兄心白日收真氣黃鍾輟太音江門空老我落
葉滿秋林

零落辰星後斯文失主盟病多憂國淚出爲薦
書行宇宙浮精爽江湖問姓名彭殤非壽夭不

朽是長生

峴水秋仍社招尋不見之星河成未訣涕淚倍
交顧命苦賢人短天將吾道衰茅容黃榦意獨
向月中悲

哭少谷年兄先生

陳 墀

痛惜鄭夫子高才與命妨道因儒術重詩遍士
林揚今古脩文地乾坤傀儡場不堪生死別涕
淚滿衣裳

廿年同榜客一別幾經秋我愧留徐劔君應賦
玉樓江流終古恨霄漢此生浮悵望南湖路風
煙黯不收

邳下遇少谷訃

王希旦

遠訃臨深夜長風悄客燈病魔回玉女道否失
金陵雲谷心長在杜陵壇可登此生寧化物天
地寄除乘

哭鄭吏部繼之

王 昂

少谷真死矣傳聞久尚驚文章憎爾命造化忌
人名出處道何愧經綸志未亨獨餘遺稿在山

岳共崢嶸

少谷墓下雨夜感懷 傅汝舟

良友已亡悲鳳死遺編雖在泣麟窮休論十載
追趨地只漫千山夢寐中青草漸生今日雨白
楊時動故園風撫墳豈稱酬知己愁絕春原薜
荔叢

冬日過少谷墓下 高澂

一自玉棺葬西麓歲寒空爲掃楸梧心悲白日
猿偏哭氣逼青陽鳥亂呼生死丈夫元不二妻
孥友道竟何孤終傷泉路同幽憤未信人間有
至愚

和高子過少谷墓韻 汪文盛

岑寂買山增感慨艱難營葬力支吾梅亭碑在
秋猿嘯青野堂空暮雀呼義重遺言猶在耳心
慚白日敢欺孤百年公論終難泯萬古人心不
可愚

輓少谷次旗峰韻 毛伯溫

我使三山日君開少谷堂雲蒸書帙潤月放酒

杯光舊跡松楸合新阡涕淚傷鶻花牽節物秋水咽愁長

小寄鰲峰下奇峰鴈蕩邊襟懷千頃豁詞賦萬人傳慷慨談文夕淒涼抗疏年仙姿邈何許宿草暝寒煙

四海論知己無如少谷深山川開大雅日月照貞心白壤嗟埋骨黃初慨廢音南湖風雨夢遺思泣荒林

哭鄭禮部繼之

陳沂

少谷美自匿吐氣常不勝鬱思不易發抱萼丹艷凝無意向圭組蕭散結儔朋明星忽晨隕悲難撫吾膺

過鄭吏部繼之墓

陳椿

才名稱吏部遺墓委郊原起草孤忠盡摘華雅道存秋風愁立馬落日慘啼猿誰掛延陵劍枯枝灑淚痕

丘封臨野嶠登陟想伊人路趨樵童入碑看處

士隣

墓與汝舟爲隣

生芻一以薦宿草幾經春歎息殘

編在悲歌倍損神

梅亭過鄭吏部墓

陳鳴鶴

孤魂長不寤灑酒對荒丘
生死人千載江山土
一坏夜臺寒薜荔
風雨暗松楸
他日滄洲意從君地下游

過鄭繼之吏部墓

陳仲溱

詞客去不返荒丘空暮煙
亂藤纏古隧落葉壅
寒泉恨不同時見徒增異代憐
青山多白骨獨識大夫阡

又

鄧原岳

繫馬梅亭下懷賢落日邊
蘭摧仍此地鶴化是何年
草已沒殘碣雲還迷舊阡
臨風一掬淚感激向重泉

又

陳薦夫

寥落冶城西悲風烏亂啼
荒墳樵豎識豐碣郡侯題
磨滅名猶在榛蕪路欲迷
尚餘靈秀氣長此伴虹霓

梅亭多舊塚獨識此間墳
諫草傳青漢詩名戾

白雲骨應何日朽地見幾家分東里西華意蕭
條不可聞

又

徐燭

荒墳不計年過客淚潛然朽骨藏於此吟魂何
處邊野狐啼暮雨石虎臥秋煙安得斯人起重
令大雅傳

西郭塚纍纍經過下馬誰先生一坏土詞客百
年悲藤護將崩石苔封未斷碑應知靈爽在歎
我不同時

又

徐燭

昔賢寧復起大雅久無聞黃土空銷骨青山不
葬文精靈沉夜月吟味冷秋雲詞客應相識詩
成墓所焚

風流山吏部白骨閔泉扃異代思相見千年不
肯醒松楸護靈氣川岳暗文星墓隧無人治遺
編又殺青

又

袁敬烈

落日暝煙收淒涼閉一丘生年無四十姓字有

千秋孤嶺寒猿嘯空山過客愁可憐風雨夜蕭
瑟是松楸

空林閉白雲深樹易斜曛詞客當年淚先生絕
代文藤蘿牽斷碣狐兔走孤墳向夕悲風起淒
涼不可聞

讀外曾祖鄭少谷詩 陳 勳

風騷久不作大雅日已斲聖代儲元精含耀鬱
未吐自從洪永來作者紛馳騫體裁非正始色
澤勞雕塑皇皇成弘日輝輝奎壁聚北地杭前

旌信陽繼高步鄭公參其間同聲乃響赴公也
東南英道真夙所悞七星羅心胸明月間寶璐
古意逼鼎彝正音發韶濩二十登省郎蒿日壽
世務豈繫驚俗文緬懷濟時具皇圖值中微國
事方多故攬槍直紫清九土風塵暮公時諫羽
獵抗疏天爲怒且辭北闕雲歸臥南山霧波沲
憂國淚一一沾毫素千秋杜陵老餘子不足數
性本愛名山靈境窮杖屨萬一遇安期白日生
毛羽長卿苦抱疾尚平須畢娶服食願多違徵

書飛已屢終懷子牟戀敢忝南陽顧病纏劒水
舟劒瘞城西墓文章滿穹壤鬼物亦可護麒麟
翳鳳凰有識誰不慕如何蜉蝣者乃欲撼大樹
萬古江河流徒嗤爾曹誤小孫抱微尚燥髮誦
佳句懷公青野堂頻望南湖路斯人今代無天
地漭迴互

讀鄭繼之先生集

邵捷春

昭代當弘正文風薄盛唐先生敦大雅有道出
義皇筆掃蒙莊幻思翻老杜狂只今推作者能

幾見登堂

卜築鰲峰麓堂題少谷名豈專師往哲將以遲
來清僮僕供炊爨州司絕送迎出山期報

主銳意答昇平

抗疏南巡日深傷國步韞輕身投虎口垂死犯
龍顏罰跪存尸諫徼恩乞骨還奸雄今已盡荒
塚只青山

太白孫爲姓傳聞是托逃世途誰共信交誼獨
相高死寄青蠅恨喪奔白馬勞夜臺有知己長

笑解天弢

韓公徵吏部曹相趣行裝啓事未登席脩文遽
作郎武夷仙路近燕冀 帝闈長時至應觀化
天台語不忘

才名方廿載事業已千秋蚤達年空茂長終至
未售風騷標砥柱道學溯源流後嗣嗟零落誰
能問所繇

鄭少谷先生全集附錄卷之二十二終



